

**MESYUARAT PERTAMA PENGGAL PERTAMA
DEWAN UNDANGAN NEGERI PULAU PINANG
YANG KEEMPAT BELAS
02 OGOS 2018**

PERKARA : 4(B)(XII)16

**SOALAN BERTULIS OLEH AHLI KAWASAN PENANTI
YB. DR. NORLELA BINTI ARIFFIN**

16. 85% bekalan air Pulau Pinang datangnya dari Sg. Muda di mana kawasan diwartakan sebagai kawasan pembalakan dan aktiviti pembalakan sedang dijalankan ke atas 163,000 hektar tanah.
- (a) Bolehkah Kerajaan Negeri menghantar permohonan kepada Majlis Bekalan Air yang dipengerusikan oleh Y.A.B. Timbalan Perdana Menteri untuk menukar status gazet tanah kepada kawasan tadahan air?

**YB. ZAIRIL KHIR JOHARI
MENJAWAB BAGI PIHAK Y.A.B. KETUA MENTERI**

16. 85% bekalan sumber air Negeri Pulau Pinang adalah diperolehi dari Sungai Muda. Sungai Muda merupakan sungai yang menyalurkan air mentah bagi Negeri Kedah dan Pulau Pinang dari Empangan Beris. Sungai ini berukuran 178 kilometer panjang yang melalui daerah seperti Baling, Sik, Kulim dan Kuala Muda sebelum ke Selat Melaka.

Kerajaan Negeri Pulau Pinang dan Perbadanan Bekalan Air Pulau Pinang Sdn Bhd (PBAPP) secara bersama-sama telah memohon kerjasama Kerajaan Persekutuan yang baru untuk mengharamkan SEMUA aktiviti pembalakan di kawasan Hutan Ulu Muda yang dijalankan ke atas 163,103 hektar tanah kerana pembalakan di Ulu Muda menjejaskan kuantiti dan kualiti air mentah yang terdapat di Negeri Perlis, Negeri Kedah dan juga Negeri Pulau Pinang.

Oleh kerana Ulu Muda terletak di Negeri Kedah, maka campur tangan daripada Kerajaan Persekutuan sangatlah diperlukan bagi menangani masalah pembalakan di Ulu Muda kerana ia merupakan isu sumber air mentah serantau.

Menurut Laporan Ketua Audit Negara 2014, Negeri Kedah telah melesenkan pembalakan kepada 46,264 hektar hutan dalam tempoh 2009 - 2014, termasuk kawasan di Ulu Muda. Akibat daripada kerja-kerja pembalakan tersebut telah menyebabkan air mentah di Sungai Muda tercemar dan kelihatan seperti 'teh tarik'.

Pembalakan di Ulu Muda mesti dihentikan dengan kadar segera bagi mengelakkan berlakunya krisis bekalan air serantau serta ia perlu diwartakan dan dilestarikan sebagai 'KAWASAN TADAHAN AIR WILAYAH UTARA' untuk faedah 3 buah negeri.

Untuk bersikap adil kepada Negeri Kedah, Kerajaan Persekutuan boleh mempertimbangkan pembayaran pampasan kepada Negeri Kedah sebagai ganti rugi kepada 'premium hutan' yang diperolehi daripada mengeluarkan lesen pembalakan.

Kerajaan Negeri Pulau Pinang bersama Perbadanan Bekalan Air Pulau Pinang sedang mengatur mesyuarat bersama-sama YB. Dr. A. Xavier Jayakumar, Menteri Air, Tanah dan Sumber Asli bagi memastikan pembalakan tersebut dapat dihentikan.